

CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E O CLÚSTER DA PIZARRA DE GALICIA PARA DESENVOLVER NO ÁMBITO DA SUSTENTABILIDADE A DIXITALIZACIÓN DE MATERIAIS E PRODUTOS DO SECTOR DA LOUSA COMPATIBLE CON SISTEMAS TECNOLOXÍA BIM.

Santiago de Compostela, **25 SET. 2023**

REUNIDOS:

Dona María Jesús Lorenzana Somoza, conselleira de Economía, Industria e Innovación da Xunta de Galicia nomeada polo Decreto 67/2023, do 14 de xuño, no exercicio das competencias que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

E don Víctor Miguel Cobo Arias, presidente do Clúster da Pizarra de Galicia (en adiante CLÚSTER), entidade domiciliada no Centro Tecnolóxico da Pizarra, 32330 Sobradelo de Valdeorras, Ourense, elixido na asemblea xeral celebrada o día 5 de novembro de 2019, e en virtude do estipulado polo artigo 43 dos seus estatutos, aprobados en Asemblea Xeral o día 12/02/2016 e inscritos no Rexistro Central de Asociacións da Comunidade Autónoma de Galicia co N° 2010/014458-1ª.

Ambos actúan no exercicio dos seus cargos e, na representación que ostentan, recoñécense capacidade para obrigarse nos termos deste convenio de colaboración e para o efecto

EXPOÑEN:

Primeiro.- O artigo 48.1 da Lei 40/2015, do 1 de outubro, de réxime xurídico do sector público, establece que as administracións públicas, os seus organismos públicos e entidades de dereito público vinculados ou dependentes e as universidades públicas, no ámbito das súas respectivas competencias, poden subscribir convenios con suxeitos de dereito público e privado, sen que iso poida supoñer cesión da titularidade da competencia, sinalando no seu apartado 3 que a subscripción de convenios deberá mellorar a eficiencia da xestión pública, facilitar a

utilización conxunta de medios e servizos públicos, contribuír a realización de actividades de utilidade pública e cumprir coa lexislación de estabilidade orzamentaria e sustentabilidade financeira.

Pola súa banda, o apartado 7 do mesmo artigo puntualiza que cando un convenio instrumente unha subvención deberá cumprir co previsto na Lei 38/2003, de 17 de novembro, xeral de subvencións, e na normativa autonómica de desenvolvemento.

Segundo.- O Decreto 116/2022, do 23 de xuño, polo que se establece a estrutura orgánica da Vicepresidencia Primeira e Consellería de Economía, Industria e Innovación (DOG núm. 126, do 04.07.2022), configura esta (actual Consellería de Economía, Industria e Innovación -en adiante CEII- conforme ao Decreto 59/2023, do 14 de xuño, polo que se establece a estrutura orgánica da Xunta de Galicia) como o departamento da Xunta de Galicia ao cal lle corresponde o exercicio das competencias e funcións nos ámbitos de promoción e dinamización da actividade mineira e do aproveitamento dos recursos minerais.

As competencias en materias de minas están atribuídas á Dirección Xeral de Planificación Enerxética e Recursos Naturais e a este centro directivo correspóndelle, en particular, o impulso de plans, programas, medidas e incentivos económicos orientados ao desenvolvemento, á innovación, ao incremento da competitividade e á internacionalización do sector mineiro de Galicia.

Terceiro.- A metodoloxía BIM, acrónimo das palabras en inglés Building Information Modeling, é un proceso de xeración e xestión de datos e información dun edificio, infraestrutura ou unha construción en xeral, ao longo de todo o seu ciclo de vida. A BIM é unha metodoloxía de traballo orientada á xestión eficiente da información nas contornas colaborativas. O uso dun software dinámico de modelado permite non só a representación tridimensional dos activos baseada en elementos con metadatos asociados, se non tamén simular a planificación dos traballos (4D), xestionar as medicións e custes (5D) todo isto co obxectivo último de identificar, analizar e xestionar riscos de modo máis eficiente nunha contorna virtual.

Esta é unha nova forma de traballar que ven a formar parte da estratexia empresarial para a xestión integral dos proxectos de construción, derivada da contorna da programación. Se ben os programas CAD de modelado imitaban ao debuxo tradicional, BIM semella procesos reais de construción e mantemento. De aí a revolución e a innovación derivada.



XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

Esta forma de traballo permite á persoa que proxecta, constrúe e/ou opera unha infraestrutura compartir información ao longo da vida do proxecto, e ofrecer a posibilidade de ir modificándoa a medida que aparecen variacións ou xordan cambios. Deste xeito, ao estar todo vinculado, aumenta a trazabilidade de cada elemento e se eliminan duplicidades de información contidas en varias fontes.

Entre os beneficios do BIM podemos mencionar os seguintes:

- Mellorar a administración de datos e información complexa de proxectos.
- Os modelos 3D facilitan a comprensión dun proxecto.
- Permite reducir os prazos de entrega e custes dos proxectos.
- Permite mellorar a calidade dos proxectos.
- Permite o desenvolvemento de deseños máis eficientes e sustentables, diminuíndo o consumo de enerxía e emisións.
- Permite a colaboración multidisciplinaria en tempo real baixo un modelo colaborativo na nube.
- Transparenta os procesos debido a que a información sempre será visible nas plataformas web ou móbiles.
- Permite prever e solucionar os problemas de maneira anticipada, evitando así gastos adicionais aos previstos.
- Permite executar simulacións sobre o comportamento dun edificio nos seus diferentes sistemas.

Cuarto.- O CLÚSTER, constituído por corenta empresas que teñen a súa actividade relacionada coa lousa, ten entre os seus fins, o incremento do nivel de competitividade do sector da lousa, promovendo e impulsando a execución de proxectos concretos de carácter innovador e a interacción dos distintos axentes co fin de dinamizar e fomentar as relacións entre eles, servir de centro de documentación para todos os asociados e realizar os estudos, así como calquera outras competencias, facultades ou funcións que se consideren necesarias ou convenientes para o cumprimento dos seus fins.

Quinto.- De conformidade coa Axenda 2030 para o desenvolvemento sustentable das Nacións Unidas, a sustentabilidade conxuga tres dimensións: económica, social e ambiental. Neste senso, o desenvolvemento sustentable, entendido como a conxunción de progreso económico, xustiza social e protección medioambiental, implica non só a aplicación das técnicas máis respectuosas co medio ambiente e coa preservación dos ecosistemas naturais e a rehabilitación do espazo natural.





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

afectado, senón tamén a integración social da actividade económica e a creación de valor para a comunidade social afectada, tanto durante o desenvolvemento da explotación como unha vez rematada esta, reconvertendo antigas infraestruturas mineiras en motores de desenvolvemento económico e social, contribuíndo á sustentabilidade social e territorial, ademais de preservar o legado histórico e cultural de Galicia.

A aplicación efectiva do principio de desenvolvemento sustentable no ámbito da minería non só supón un obxectivo primordial para a CEII, compartido polo CLÚSTER, senón o marco no que, de conformidade coa Axenda 2030 e cos obxectivos da Unión Europea e a lexislación comunitaria, han de desenvolverse as políticas públicas para o sector da minería, e particularmente para o sector da lousa.

O Goberno de Galicia cre nunha minaría segura e sustentable, capaz de crear máis valores e máis emprego para a nosa comunidade, partindo da defensa do estrito cumprimento da legalidade vixente. E así o veñen reforzar as modificacións lexislativas aprobadas nos últimos anos, sempre na busca da excelencia ambiental e na promoción do desenvolvemento sustentable deste sector, e recentemente coa posta en marcha da Axenda de impulso da minaría sustentable de Galicia (AMSG) 2030, unha nova ferramenta a modo de folla de ruta que recolle, entre os seus obxectivos estratéxicos, alcanzar a modernización e o crecemento do sector da minería sostible en Galicia.

Neste marco, na Axenda de impulso de minería sostible de Galicia 2030, contempla como obxectivo operativo conseguir a modernización tecnolóxica e a mellora da eficiencia e o desempeño ambiental das explotacións mineiras. En concreto, a "innovación e dixitalización das empresas" é un dos seus eixes estratéxicos, tendo como finalidade a introdución no sector das novas tecnoloxías, as mellores técnicas dispoñibles e o coñecemento, no que teñen un claro encaixe as actuacións específicas obxecto deste convenio.

Polo tanto, a través do convenio que instrumenta o outorgamento desta subvención, finánciase, en definitiva, a execución de actuacións específicas no ámbito da minería da lousa, que responden á consecución que se pretende, isto é, que sexan de utilidade para a aplicación efectiva do principio de sustentabilidade no ámbito da minería da lousa nas súas dimensión económica e social.



Sexto.- No contexto descrito, tendo en conta a configuración do CLÚSTER como a entidade que integra ao sector da lousa en Galicia practicamente na súa totalidade, abarcando todo o proceso da extracción, elaboración, comercialización, colocación e de I+D+i, é dicir, toda a cadea de valor da lousa, constitúe a entidade idónea para levar a cabo as actuacións que son obxecto deste convenio que sexan de utilidade cara á consecución da dixitalización de materiais e produtos do sector da lousa compatible con sistemas tecnoloxía BIM, de cara ao aumento da competitividade e modernización deste sector e que poidan ser difundido e fomentado entre as empresas que forman parte do clúster da lousa.

É por isto polo que se xustifican a dificultade da súa convocatoria pública e a súa concesión a través do procedemento de concesión directa.

Sétimo.- Por todo o anterior, as actuacións obxecto do convenio responden ao interese xeral e existen razóns de interese público, social e económico que xustifican, conforme ao artigo 19.4.c) e 26.2.a) da Lei 9/2007, do 13 de xuño, de subvencións de Galicia, a colaboración da Xunta de Galicia, a través da CEII, no financiamento das ditas actuacións a través deste convenio para a concesión dunha subvención directa de carácter singular ao CLÚSTER.

Oitavo.- Na Lei 6/2022, do 27 de decembro, de orzamentos xerais da Comunidade Autónoma de Galicia para o ano 2023, figura a aplicación orzamentaria 05.03.734A-780.0, na que existe crédito dispoñible suficiente.

En consecuencia, as partes acordan subscribir este convenio de conformidade coas seguintes:

CLÁUSULAS

Primeira.- Obxecto e descrición das actuacións.

1.- Este convenio ten como obxecto regular o financiamento ao CLÚSTER para levar a cabo durante o ano 2023 a dixitalización de materiais e produtos do sector da lousa compatible con sistemas tecnoloxía BIM.

O propósito deste convenio é dotar ao CLÚSTER do coñecemento e a tecnoloxía necesaria para que as empresas que o forman aborden a dixitalización dos seus produtos de forma que o seu uso en calquera das fases dos proxectos de



XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

edificación e infraestruturas sexa compatible coa tecnoloxía BIM empregada polos distintos axentes do sector AECO (arquitectos/as, enxeñeiros/as, decoradores/as, construtores/as, institucións públicas e privadas e promotores) que de forma gradual se está impondo como a tecnoloxía propia de noso tempo para o desenvolvemento de proxectos.

O fin último é proporcionar ás empresas do CLÚSTER a posibilidade de adherirse a unha estratexia común de eficacia probada (caso Hispalyt) para aumentar a visibilidade dos seus produtos entre as comunidades de prescriptores e técnicos da industria da construción e dotarlles das ferramentas que lles permitan medir o impacto e emprender accións de marketing ou comerciais tomando decisións baseadas en datos reais.

2.- As actuacións concretas obxecto do convenio son as que se describen a continuación:

BIMOBJECT levará a cabo:

- Análise particularizado das solucións técnicas "xenéricas" a desenvolver para o CLÚSTER e asesoramento sobre como afrontar o desenvolvemento para a posterior integración dos produtos das empresas que forman o CLÚSTER.
- Desenvolvemento das solucións técnicas acordadas como obxectos BIM (ex, fachada ventilada de pedra natural, etc).
- Creación das páxinas de "marca" e as páxinas de produto do CLÚSTER na plataforma BIMobject.com para a súa publicación e distribución entre os usuarios desta plataforma.
- Preparación e participación nunha xornada informativa para as empresas do CLÚSTER do propósito e alcance destas solucións técnicas que se vai a levar a cabo polo CLÚSTER. Esta presentación poderá ser presencial ou telemática.

Pola súa banda, para a consecución dos anteditos obxectivos, o CLÚSTER contratará á FUNDACIÓN CENTRO TECNOLÓXICO DA PIZARRA que deberá referente aos MATERIAIS DE CONSTRUCCIÓN, achegar a seguinte documentación:

Nome do produto, descrición, espesor, condutividade térmica, densidade, resistencia á abrasión, resistencia ao fogo, absorción acústica do impacto, módulo



de rotura, absorción de auga, ciclo de xeo/desxeo, contido en carbonato cálcico e de carbonato non carbonatado, exposición ao dióxido de xofre, ciclo térmico, etc...

En canto aos SISTEMAS CONSTRUTIVOS, se deberá achegar, ademais da documentación anterior, as CAPAS que compoñen a cuberta de lousa en cada caso, como mellor solución construtiva.

Por outra banda, tamén se achegarán fotografías dos distintos materiais.

Para a realización destas tarefas é preciso contar coa entidade especializada FUNDACIÓN CENTRO TECNOLÓXICO DA PIZARRA por ser a única entidade acreditada por ENAC para realizar os ensaios descritos anteriormente.

Segunda.- Interese público concorrente.

Nos termos descritos na parte expositiva, as actuacións descritas na cláusula anterior, consoantes coas finalidades e funcións do CLÚSTER, teñen como obxectivo último aplicación efectiva do principio de desenvolvemento sustentable no ámbito da minería, concretamente no sector da lousa, e no particular ao reducir os prazos de entrega e custes e mellorar a calidade dos proxectos e por outra banda ao permitir o desenvolvemento de deseños máis eficientes e sustentables, ao diminuír o consumo de enerxía e emisións, permítese o aumento da competitividade e modernización do sector, revertendo este valor na comunidade.

Terceira.- Custo das actuacións e financiamento das mesmas.

1.- O custo total das actuacións obxecto do convenio estímase en **VINTE E CINCO MIL EUROS (25.000,00 €)**, IVE incluído, o cal se detalla a continuación por tipos de actuacións:

ACTUACIÓN	ORZAMENTO (€)
Proxecto de desenvolvemento de materiais e sistemas construtivos BIM	10.188,20
Información, documentación e ensaios	14.811,80
TOTAL CONVENIO 2023	25.000,00

2.- Calquera modificación das cláusulas deste convenio deberá ser solicitada a CEII, quen decidirá sobre a súa procedencia, e no caso de aceptarse levarase a cabo a súa



**XUNTA
DE GALICIA**

CONSELLERÍA DE
ECONOMÍA, INDUSTRIA
E INNOVACIÓN



**CLUSTER
DA PIZARRA
DE GALICIA**

formalización mediante a correspondente addenda, consonte ao artigo 35 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia.

Cuarta.- Obrigas da Consellería de Economía, Industria e Innovación.

1.- Para o financiamento dos gastos que xeren as actividades obxecto deste convenio que se recollen na cláusula primeira, a Xunta de Galicia, a través da CEII, achegará con cargo aos orzamentos xerais da Comunidade Autónoma para o ano 2023, ata un máximo de **VINTE E CINCO MIL EUROS (25.000,00 €)** con cargo a aplicación orzamentaria **05.03.734A-780.0** "Axudas programa de sustentabilidade no sector mineiro", proxecto 2023/00004, na que existe crédito adecuado e suficiente para tal fin.

2.- No suposto de que se produzan variacións á alza no custo final total das actuacións, calquera que sexa a causa, ditas variacións serán asumidas integramente polo CLÚSTER, sen que en ningún caso a obriga de financiamento da CEII poda exceder da cantidade de 25.000,00 €.

3.- No suposto de que se produzan variacións á baixa no custo final das actuacións derivadas de procedementos de contratación ou doutras causas, a achega da CEII non superará o custo final das actuacións nin excederá de 25.000,00 €.

Quinta.- Carácter da achega.

De conformidade co disposto polos artigos 19.4.c) e 26.2.a) da Lei de 9/2007, do 13 de xuño, de subvencións de Galicia, a achega referida na cláusula anterior, constitúe unha subvención de concesión directa, a cal se instrumenta a través deste convenio de colaboración.

Sexta.- Obrigas específicas do CLÚSTER .

1.- Ao CLÚSTER correspóndelle realizar todas as actuacións necesarias para a execución das actuacións obxecto deste convenio, incluídas a obtención de todas aquelas autorizacións precisas para a súa execución, así como a de cumprir as condicións e obrigas nel recollidas.

2.- Co obxecto de garantir a adecuada execución do convenio asumirá a dirección das actuacións e asignará os medios humanos e materiais que sexan necesarios e





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

no seu caso, poderá subcontratar ata o 100% dos servizos precisos para desenvolver as actuacións recollidas na cláusula primeira do convenio, asumindo expresamente o contido dos límites e deberes establecidos no artigo 27 da Lei 9/2007, do 13 de xuño, de subvencións de Galicia, e de conformidade coa normativa reguladora da contratación do sector público.

3.- Sen prexuízo das demais obrigas especificadas nas cláusulas deste convenio, así como das obrigas que resulten da lexislación orzamentaria, de subvencións e da restante normativa aplicable, o CLÚSTER comprométese a executar as actuacións descritas na cláusula primeira nos termos seguintes:

- a) Destinar os fondos que perciba ao obxecto concreto deste convenio no período comprendido entre o 1 de xaneiro de 2023 e 1 de decembro de 2023.
- b) Xustificar ante a Xunta de Galicia o cumprimento do convenio e a execución das actuacións que constitúen o obxecto deste así como o seu custo real, no tempo e na forma establecidas neste convenio.
- c) As restantes obrigas que resulten aplicables recollidas na Lei 9/2007, de 13 de xuño, de subvencións de Galicia, sen prexuízo das cláusulas deste convenio.

Sétima.- Obrigas previas á sinatura do convenio.

Con carácter previo á subscripción deste convenio, o CLÚSTER acreditará, ante a CEII, o seguinte:

- 1.- Que se atopa ao corrente nas súas obrigas tributarias e coa Seguridade Social, e que non ten pendente de pagamento ningunha débeda, por ningún concepto, coa Administración Pública da Comunidade Autónoma de Galicia, tal e como se contempla 11.e) da Lei 9/2007, de 13 de xuño, de subvencións de Galicia. Esta acreditación poderá ser substituída pola autorización á CEII para solicitar as ditas certificacións de estar ao corrente ou ben por unha declaración responsable do solicitante.
- 2.- Declaración responsable de non estar incurso en ningunha das prohibicións para a obtención de subvencións contempladas no artigo 10.2 e 3 da Lei 9/2007, do 13 de xuño, de subvencións de Galicia.
- 3.- Declaración responsable de non ter solicitadas axudas ou, no seu caso, as que teña solicitadas, así como das concedidas por outras administracións públicas ou



por calquera dos seus organismos, entes ou sociedades, para as actuacións obxecto do presente convenio. A declaración presentada acompañarase do Anexo III.

Oitava.- Gastos subvencionables.

Consideraranse subvencionables os gastos que de xeito indubidable respondan á natureza das actividades obxecto deste convenio, estean directamente relacionados co obxecto das actuacións financiadas, se correspondan coas actividades relacionadas nos epígrafes da cláusula primeira para cada actuación e se realicen dentro do período comprendido entre o 1 de xaneiro de 2023 e o 1 de decembro de 2023.

Considerarase gasto realizado aquel efectivamente pagado con anterioridade á finalización do período de xustificación. En ningún caso o custo de adquisición dos gastos subvencionables poderá ser superior ao valor de mercado.

Os gastos axustaranse ao disposto no artigo 29 da Lei 9/2007, do 13 de xuño, de subvencións de Galicia.

Cando o importe do gasto subvencionable supere as contías establecidas na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, prestación do servizo ou entrega do ben, salvo que polas súas especiais características non exista no mercado suficiente número de entidades que as realicen, presten ou subministren, ou salvo que o gasto se realice con anterioridade á sinatura do presente convenio.

Os gastos subvencionables figurarán desagregados, por tipo de actuación e por actividades concretas, segundo o cadro do Anexo I do texto deste convenio.

O imposto sobre o valor engadido considerarase subvencionable cando non sexa susceptible de recuperación ou compensación por parte do CLÚSTER.

Non se considerarán subvencionables os seguintes gastos:

1. Os de amortización de elementos inventariables.
2. Os gastos financeiros.
3. Os gastos de garantía bancaria.

Así como os previstos como tales no punto 7 do artigo 29 da Lei 9/2007, de 13 de xuño:

1. Os xuros deudores das contas bancarias.
2. Os xuros, recargas e sancións administrativas e penais.
3. Os gastos de procedementos xudiciais.

Novena.- Obtención doutras subvencións ou recursos.

En aplicación do artigo 17 da Lei 9/2007, do 13 de xuño, de subvencións de Galicia a percepción desta axuda será compatible coa percepción doutras subvencións, axudas, ingresos, ou recursos para as mesmas finalidades, procedentes de calquera administración pública ou entes públicos ou privados, nacionais, internacionais, da Unión Europea ou de organismos internacionais, sen prexuízo do importe finalmente xustificado.

En calquera caso o importe da axuda a percibir en ningún caso poderá ser de tal contía que, illadamente ou en concorrencia con outras, supere o custo total do investimento que se considere subvencionable.

O CLÚSTER deberá comunicar á CEII a obtención doutras subvencións, axudas, ingresos ou recursos que financien as actividades obxecto do convenio, así como a modificación das circunstancias que fundamentaran a súa sinatura.

Esta comunicación deberá efectuarse no momento no que se teña coñecemento das anteriores circunstancias e, en todo caso, con anterioridade á xustificación da aplicación dada aos fondos percibidos.

Décima.- Facultades de inspección e control.

1.- A CEII poderá levar a cabo as actividades de inspección e comprobación que considere oportunas para controlar o cumprimento do obxecto e das obrigas deste convenio.

2.- Alén do anterior, a axuda estará sometida á función interventora e de control financeiro exercida pola Intervención xeral da Comunidade Autónoma, nos termos que establece o título III da Lei 9/2007, do 13 de xuño de subvencións de Galicia. Así mesmo, a entidade beneficiaria estará sometida ás actuacións de comprobación previstas na lexislación do Tribunal de Contas e do Consello de Contas. Para estes efectos, o CLÚSTER deberá prestar a súa colaboración e facilitar toda a información

que lle sexa requirida pola Intervención xeral da Comunidade Autónoma, o Tribunal de Contas e o Consello de Contas, no exercicio das súas funcións.

Undécima.- Transparencia e publicidade da colaboración.

1.- As partes asinantes deste convenio consenten expresamente o tratamento dos datos relevantes deste convenio e mailo resto das especificacións contidas no mesmo, incluídos os datos de carácter persoal, e a súa publicación no Diario Oficial de Galicia e/ou na páxina web da CEII, de acordo co establecido na normativa reguladora das subvencións e na normativa sobre transparencia e goberno aberto, coas excepcións previstas no artigo 15.2ºd) da Lei 9/2007, do 13 de xuño, de subvencións de Galicia así como, no seu caso, na Base de Datos Nacional de Subvencións, que opera como sistema nacional de publicidade de subvencións.

2.- Do mesmo xeito, de acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos de axudas, subvencións e convenios e de sancións da Xunta de Galicia, as partes asinantes deste convenio consenten expresamente a inclusión e publicidade dos datos relevantes nos rexistros públicos que proceda.

3.- En toda a información e publicidade das actividades obxecto deste convenio farase constar, nun lugar destacado, a colaboración da CEII e utilizaranse, cando proceda, a imaxe corporativa institucional da Xunta de Galicia.

Décimo segunda.- Relación laboral coa Consellería de Economía, Industria e Innovación.

A subscripción deste convenio non leva consigo relación laboral, contractual ou de calquera outro tipo entre os profesionais que vaian desenvolver as actuacións obxecto deste convenio e a Xunta de Galicia, de maneira que non se lle poderá esixir responsabilidade algunha, nin directa nin subsidiaria, polos actos ou feitos acaecidos no desenvolvemento do mesmo.

Décimo terceira.- Conta xustificativa.

- a) O CLÚSTER terá de prazo para presentar a documentación xustificativa da subvención ata o 1 de decembro de 2023.
- b) A xustificación do cumprimento das condicións impostas e da consecución dos



XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

obxectivos previstos neste convenio realizarase mediante a presentación por parte do CLÚSTER da seguinte documentación:

- A. Declaración responsable do representante legal da entidade ou da persoa que teña atribuída as facultades para o rendemento da conta xustificativa, do cumprimento da finalidade do convenio e da aplicación dos fondos destinados para tal efecto.
- B. Declaración responsable do rendemento da conta xustificativa, segundo o modelo recollido no Anexo I, que inclúa o seguinte:

- Memoria xustificativa das actuacións desenvolvidas, asinada polo representante legal da entidade, que certificará a veracidade do consignado, na que se especificarán en detalle as actividades concretas realizadas e os resultados obtidos, así como a súa relación directa cos gastos realizados na execución das actuacións financiadas, conforme á desagregación orzamentaria establecida na cláusula terceira do convenio. En particular, achegarase un listado por cada tipo de actuacións subvencionadas coa relación das actividades concretas realizadas ou nas que se teña participado.

Incluirá a xustificación sobre o impacto da axuda de cara á consecución da finalidade perseguida e do cumprimento dos obxectivos do convenio.

No seu caso, achegarase material gráfico, folletos, programas, fotografías ou calquera entregable que se deriven ou se elaboren con ocasión do desenvolvemento das actividades.

- Memoria económica abreviada xustificativa do custo das actividades realizadas ao abeiro deste convenio que conterá unha relación clasificada das actividades realizadas e dos gastos e investimentos de cada actividade, con identificación do acredor e do documento, o seu importe, data de emisión e data de pagamento. Esta táboa virá asinada e selada polo responsable legal da entidade. Os gastos figurarán ordenados e desagregados por actividade e entregarase en formato dixital, como folla de cálculo, de acordo aos modelos establecidos no Anexo I. En follas de cálculo aparte figurarán as relacións de gastos correspondentes ás axudas concedidas compatibles co presente convenio, así como a porcentaxe de imputación segundo o Anexo I.

- Informe dun auditor de contas inscrito como exercinte no Rexistro Oficial de Auditores de Contas, dependente do Instituto de Contabilidade e Auditoría de Contas, para cuxa comprobación se entregará xunto coa documentación xustificativa unha certificación rexistral de tal extremo.

O nomeamento do auditor farase por parte do CLÚSTER. No caso de que a entidade beneficiaria estea obrigada a auditar as súas contas anuais.





poderá nomear ao mesmo auditor encargado das contas anuais ou a un terceiro inscrito no ROAC.

A actuación profesional do auditor de contas someterase ao disposto nas Normas de Actuación aprobadas mediante Orde EHA/1434/2007, do 17 de maio, pola que se aproba a norma de actuación dos auditores de contas na realización dos traballos de revisión de contas xustificativas de subvencións, no ámbito do sector público estatal, previstos no artigo 74 do regulamento da Lei 38/2003, do 17 de novembro, xeral de subvencións, aprobado mediante Real decreto 887/2006, do 21 de xullo, así como as pautas establecidas no Anexo II deste convenio.

O informe de auditoría alcanzará a totalidade dos xustificantes acreditativos dos gastos elixibles, así como a súa correcta emisión e contabilización. Se por calquera circunstancia, o auditor non puidese realizar na súa totalidade os procedementos previstos na Orde EHA/1434/2007, do 17 de maio, mencionaranse os procedementos omitidos con indicación da súa causa.

Deberá incluír mención a que o beneficiario facilitou tanta información lle solicitou o auditor para realizar o traballo de revisión. No caso de que o beneficiario non facilitase a totalidade da información solicitada, mencionárase tal circunstancia con indicación da información omitida.

Así mesmo incluírá resultado das comprobacións realizadas, mencionando os feitos observados que puidesen supoñer un incumprimento por parte do beneficiario da normativa aplicable ou das condicións impostas para a percepción da subvención, debendo proporcionar a información co suficiente detalle e precisión para que o órgano xestor poida concluír respecto diso.

- C. Declaración responsable da persoa representante legal da entidade, asumindo o compromiso de custodiar a documentación xustificativa orixinal nas relacións de gastos durante o período que resulte de aplicación e aportala cando sexa requirida polo órgano concedente para a revisión e control da xustificación do convenio e no seu caso pola Intervención no marco das súas actuacións de control financeiro, ou polo Tribunal de Contas para as actuacións previstas na súa lexislación específica en relación co investimento dos fondos públicos.
- D. Declaración responsable de non ter solicitadas axudas ou, no seu caso, das que teña solicitadas, así como das concedidas por outras administracións públicas ou por calquera dos seus organismos, entes ou sociedades, para a execución das actuacións obxecto do presente convenio. A declaración presentada acompañarase do Anexo III.
- E. Certificados de que se atopa ao corrente nas súas obrigas tributarias e coa Seguridade Social, e que non ten pendente de pagamento ningunha débeda.





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

por ningún concepto, coa administración pública da Comunidade Autónoma de Galicia, tal e como se contempla 11.e) da Lei 9/2007, do 13 de xuño, de subvencións de Galicia. Esta acreditación poderá ser substituída pola autorización á CEII para solicitar as ditas certificacións de estar ao corrente ou ben por unha declaración responsable do solicitante.

F. Declaración responsable relativa á titularidade da conta onde se debe realizar o pagamento.

G. Declaración responsable relativa á situación da entidade en relación ao imposto sobre o valor engadido (IVE).

Os órganos competentes da CEII poderán solicitar as aclaracións ou informes relativos á xustificación do investimento que consideren convenientes.

Décimo cuarta.- Pagamento.

1. O pagamento da achega económica da CEII realizarase, de conformidade co artigo 60 do Decreto 11/2009, do 8 de xaneiro, polo que se aproba o regulamento que desenvolve a Lei 9/2007, do 13 de xuño, de subvencións de Galicia, polo importe máximo e coas condicións establecidas nas cláusulas terceira e cuarta do presente convenio.
2. Dada a natureza dos gastos subvencionables, prevese a posibilidade da realización de pagamentos a conta. O CLÚSTER poderá facer unha única solicitude de pagamento a conta, con data límite o 1 de setembro de 2023. O importe solicitado aboarase tendo en conta exclusivamente os gastos correctamente xustificadas e non superará a porcentaxe do 80% dos mesmos. A realización de pagamentos a conta estará suxeita ao réxime de garantías regulado no artigo 67 do Decreto 11/2009, do 8 de xaneiro, polo que se aproba o Regulamento que desenvolve a Lei 9/2007, do 13 de xuño, de subvencións de Galicia. En concreto, a garantía deberá cubrir o 110% do importe das cantidades aboadas a conta con independencia do prazo previsto para a xustificación establecido no presente convenio.

Décimo quinta.- Perda do dereito ao cobramento.

Segundo o disposto no artigo 31.5 da Lei 9/2007, do 13 de xuño, producirase a perda do dereito do CLÚSTER ao cobramento total ou parcial da subvención no suposto de falta de xustificación ou no suposto de concorrencia dalgunha das causas previstas no artigo 33 da Lei de subvencións de Galicia que resulten aplicables.





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

Décimo sexta.- Reintegros.

Procederá o reintegro parcial ou total das cantidades percibidas xunto cos xuros de demora correspondentes, de conformidade co procedemento establecido no artigo 38 da Lei de subvencións de Galicia, nos supostos establecidos no artigo 33 da Lei 9/2007, do 13 de xuño de subvencións de Galicia que resulten aplicables e, ademais, nos seguintes supostos:

- a) Sempre e cando o cumprimento polo beneficiario se aproxime de modo significativo ao cumprimento total e se acredite por este unha actuación inequivocamente tendente á satisfacción dos seus compromisos, procederá o reintegro parcial segundo os seguintes criterios:
 - O incumprimento dos obxectivos parciais ou actividades concretas da actuación levará a devolución daquela parte da axuda destinada ás mesmas.
 - A realización de gastos fora do prazo de execución, suporá a devolución das cantidades investidas fóra de prazo.
 - A non presentación das correspondentes xustificacións, de acordo co establecido na cláusula décimo terceira deste convenio, levará a devolución das cantidades percibidas e non xustificadas, logo do requirimento establecido no punto 2, artigo 45 do regulamento da Lei 9/2007, de 13 de xuño de subvencións de Galicia.
- b) Incumprimento das obrigas do CLÚSTER recollidas ao longo deste convenio, cando así se estableza.
- c) No caso de que tivera lugar a concorrencia doutras axudas que puideran superar o custo das actuacións, a achega da CEII minorarase na cantidade correspondente. O beneficiario, de ser o caso, terá que reintegrar as cantidades correspondentes e os xuros de demora dende o momento do pago da axuda.

Décimo sétima.- Comisión de seguimento.

1.- Para facilitar a coordinación entre as partes asinantes e o seguimento da execución do obxecto do convenio e do cumprimento das súas cláusulas, constituirase unha comisión de seguimento integrada por:

- Dúas persoas representantes da Dirección Xeral de Planificación Enerxética





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

- e Recursos Naturais
- Dúas persoas representantes do CLÚSTER

A comisión rexerá polo establecido na Lei 40/2015, do 1 de outubro, de réxime xurídico do sector público.

2.- As funcións da comisión serán:

- Facilitar a coordinación entre as partes asinantes
- Seguimento da execución do obxecto do convenio e do cumprimento das súas cláusulas
- Interpretación do convenio e resolución de dúbidas
- Proposta, de ser o caso, de addendas
- Calquera outras relacionadas co desenvolvemento e bo fin deste convenio

Décimo oitava.- Extinción do convenio e causas de resolución.

1.- Este convenio extinguirase polo cumprimento total das actuacións que constitúen o seu obxecto ou por incorrer en causa de resolución.

2.- Son causas de resolución deste convenio:

- a) O incumprimento total ou parcial do obxecto do convenio así como o incumprimento de calquera das cláusulas e obrigas establecidas nel.
- b) O acordo unánime das partes asinantes.
- c) A decisión xudicial declaratoria da nulidade do convenio.
- d) Calquera outra causa previstas nas leis.

De resolverse o convenio, a CEII poderá esixir o reintegro das cantidades achegadas, de ser o caso.

Décimo novena.- Vixencia do convenio.

1.- O presente convenio entrará en vigor o día da súa sinatura e esténdese ata o 1 de decembro de 2023. Consonte ao recollido no apartado 3.a) da cláusula sexta, admitiranse actividades do presente convenio anteriores á súa sinatura levadas a cabo dende o 1 de xaneiro de 2023.

2.- Este convenio é susceptible de prórroga sempre que, antes da finalización do prazo previsto no parágrafo anterior, as partes asinantes tramiten e subscriban a correspondente addenda.





XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

Vixésima.- Natureza xurídica e réxime xurídico.

1.- Este convenio ten natureza administrativa de conformidade coa Lei 40/2015, do 1 de outubro, de réxime xurídico do sector público e queda excluído do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, en virtude do establecido nos seus artigos 4 e 6, sen prexuízo da aplicación dos principios do devandito texto legal para resolver as dúbidas e lagoas que puideran presentarse.

2.- Este convenio rexerese polas súas propias cláusulas e está suxeito ao disposto no Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares publicado mediante a resolución da Consellería de Economía e Facenda do 8 de abril de 1991 (DOG nº 82, do 30 de abril), así como ao disposto na Lei 1/2016, do 18 de xaneiro, de transparencia e bo goberno e na Lei 40/2015, do 1 de outubro, de réxime xurídico do sector público.

3.- En todo o non previsto expresamente neste convenio, o réxime da subvención que a través del se instrumenta será o establecido nos preceptos básicos da Lei 38/2003, do 21 de xullo, e do Real Decreto 887/2006, de 21 de xullo, polo que se aproba o regulamento que a desenvolve; na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o regulamento autonómico que desenvolve a Lei 9/2007, do 13 de xuño, de subvencións de Galicia e nas demais normas de dereito administrativo.

4.- As discrepancias que xurdan pola aplicación deste convenio serán resoltas, logo do informe ou proposta da comisión de seguimento, pola CEII, quedando as partes suxeitas á xurisdición contencioso-administrativa para a resolución de calquera conflito que puidese xurdir na súa aplicación.



Lido este documento, e en proba de conformidade, asíñase polas partes, en duplicado exemplar, no lugar e data ao principio indicados.



A conselleira de Economía, Industria e Innovación

Maria Jesús Lorenzana Somoza

O representante do Clúster da Pizarra de Galicia

Víctor Miguel Cobo Arias



XUNTA
DE GALICIA

CONSELLERÍA DE
ECONOMÍA, INDUSTRIA
E INNOVACIÓN



CLUSTER
DA PIZARRA
DE GALICIA

ANEXO I

MODELO DE CONTA XUSTIFICATIVA DA APLICACIÓN DOS FONDOS CONCEDIDOS AO ABEIRO DO CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E O CLÚSTER DA PIZARRA DE GALICIA PARA DESENVOLVER NO ÁMBITO DA SUSTENTABILIDADE A DIXITALIZACIÓN DE MATERIAIS E PRODUTOS DO SECTOR DA LOUSA COMPATIBLE CON SISTEMAS TECNOLOXÍA BIM .

D., como representante do Clúster da Pizarra de Galicia con NIF e enderezo en, beneficiaria do CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E O CLÚSTER DA PIZARRA DE GALICIA PARA DESENVOLVER NO ÁMBITO DA SUSTENTABILIDADE A DIXITALIZACIÓN DE MATERIAIS E PRODUTOS DO SECTOR DA LOUSA COMPATIBLE CON SISTEMAS TECNOLOXÍA BIM por un importe de €, declara baixo a súa responsabilidade ter realizado un gasto por importe de€ e, en cumprimento do disposto na cláusula décima terceira do devandito convenio, rindo ante a antedita Consellería conta xustificativa do gasto realizado composto por unha memoria de actuación que se acompaña e unha memoria económica abreviada xustificativa do custo das actividades realizadas que se acompaña como o cadro e informe de auditor.

En....., a de de 2023



CADRO: RELACIÓN DE GASTOS

Nome do beneficiario:

NIF do Beneficiario:
subvencionable

Orzamento

REF. (1)	Descrición do gasto (2)	Provedor	C.I.F. Provedor	Nº. Factura	Data emisión factura	Data pagamento factura	Importe neto factura	IVE (3) (non repercutible)	Custo total (IVE incluído)	Importe imputado (%)	Importe imputado (€)
1											
2											
3											
4											
5											
XX											
TOTAL PÁXINA											

NOTAS explicativas:

- Achequear os documentos segundo esta orde de referencia
- De ser necesario, incluírase unha explicación clara e comprensiva do gasto imputado, ademais de non imputarse tódolos conceptos da factura, indicándose os que forman parte da xustificación.
- IVE non repercutible soportado polo beneficiario

Asina representante legal e selo entidade beneficiaria



ANEXO II: PAUTAS A SEGUIR POLO AUDITOR PARA A REALIZACIÓN DA REVISIÓN DA CONTA XUSTIFICATIVA

A.- PROCEDEMENTOS

O auditor debe aplicar os procedementos recollidos no artigo 3 do anexo da Orde EHA/1434/2007, do 17 de maio. Resúmense a continuación:

1. Procedementos de carácter xeral:

- a) Comprensión das obrigas impostas ao beneficiario.
- b) Solicitude da conta xustificativa. Comprobación dos elementos da conta xustificativa, e da competencia da persoa que a subscribe.
- c) Informe de auditoría e comunicación co auditor de contas. Se o auditor é diferente do que auditou as contas anuais da entidade, exame da devandita auditoría para coñecer se contén algunha excepción que puidese condicionar o traballo de revisión.

2. Procedementos específicos relativos á conta xustificativa:

- a) Revisión da Memoria de actuación, o auditor deberá analizar o contido da dita memoria e estar atento, ao longo do seu traballo, ante a posible falta de concordancia entre a información contida nesta memoria e os documentos que serviran de base para a realización da xustificación económica.

Igualmente, levará a cabo a comprobación da efectiva realización polo beneficiario das actividades subvencionadas para o que deberá proceder á verificación de soporte documental, á revisión de datos obxectivamente contrastables, á inspección física dos elementos tanxibles, ou outros, que, atendendo a o seu criterio profesional, estime necesarios.

- b) Revisión da Memoria económica abreviada.

1. Que a información económica contida na memoria está soportada por unha relación clasificada dos gastos e investimentos da actividade subvencionada, con identificación do acreedor e da factura, o seu importe, data de emisión e a data de pago.
2. Que a entidade dispón de documentos orixinais acreditativos dos gastos xustificandos e do seu pago e que devanditos documentos foron reflectidos nos rexistros contables.
3. Que os gastos e investimentos que integran a relación cumpren os requisitos para ter a consideración de gasto subvencionable, consonte ao establecido no artigo 29 da Lei de subvencións de Galicia e ao disposto na cláusula oitava do presente convenio.
4. Que os custos indirectos se imputaron polo beneficiario á actividade subvencionada na parte que razoablemente corresponda de acordo con principios



e normas de contabilidade xeralmente admitidas e, en todo caso, na medida en que tales custos correspondan ao período en que efectivamente se realiza a actividade. Ao responder a un sistema de repartición, o auditor solicitará do beneficiario unha declaración respecto da súa natureza, contía e criterios de repartición que se anexará ao informe. Sobre a base desta información avaliarase a adecuación desta imputación. Tamén se comprobará que o seu importe atópase desagregado adecuadamente na conta xustificativa.

5. Que a entidade dispón de ofertas de diferentes provedores, nos supostos previstos no artigo 29.3 da Lei de subvencións de Galicia, e dunha memoria que xustifique razoablemente a elección do provedor, naqueles casos en que non recaese na proposta económica máis vantaxosa.

6. Que se clasificaron correctamente, de acordo co contido do convenio, os gastos e investimentos na memoria económica, especialmente naqueles casos en que o beneficiario se comprometera a unha concreta distribución dos mesmos.

7. Que se solicitou do beneficiario unha declaración das actividades subcontratadas, con indicación dos subcontratistas e importes facturados. Dita declaración incluírá unha manifestación do beneficiario respecto das situacións previstas nos apartados 4 e 7 do artigo 27 da Lei de subvencións de Galicia. De non estar permitida a subcontratación, a declaración do beneficiario conterá unha manifestación de non atoparse incurso no incumprimento desta prohibición.

O auditor comprobará ao longo da súa revisión a concordancia da información contida nesta declaración, co resto de información ou documentación utilizada polo auditor para a execución dos procedementos contemplados nesta norma.

8. Que se produce a necesaria coherencia entre os gastos e investimentos xustificadas e a natureza das actividades subvencionadas.

c) Solicitud ao beneficiario dunha declaración relativa ao financiamento da actividade subvencionada.

O auditor analizará a concorrencia de subvencións, axudas, ingresos ou recursos para a mesma finalidade, procedentes de calquera Administracións ou entes públicos ou privados, nacionais, da Unión Europea ou de organismos internacionais, a efectos de determinar a porcentaxe de financiamento do CLÚSTER e, no seu caso, o exceso de financiamento.

d) Revisión do certificado de taxación de bens inmoables, de selo caso.

e) Comprobación da carta de reintegro de remanentes, de selo caso.

f) Carta de manifestacións.

Ao termo do seu traballo o auditor solicitará á entidade beneficiaria unha carta asinada pola persoa que subscribiu a conta xustificativa, na que se indicará que se informou ao auditor acerca de todas as circunstancias que poidan afectar á correcta percepción, aplicación e xustificación da subvención. Tamén se incluírán as manifestacións que sexan relevantes e que sirvan de evidencia adicional ao auditor sobre os procedementos realizados.



g) Outros procedementos.

Ademais comprobará:

- a) O informe do auditor conterá un pronunciamento sobre a existencia dun sistema de contabilidade separada para os gastos obxecto da subvención.
- b) O informe recollerá mención expresa sobre a comprobación da elixibilidade do IVE e de selo caso, a imputación do IVE de acordo coa porcentaxe resultante da declaración da prorrata do IVE (modelo 390).
- c) No caso de que ao beneficiario lle fose de aplicación a normativa en materia de contratación do sector público, o seu cumprimento.

B.- ANALISE DOS DATOS

As comprobacións efectuaranse sobre o **100% dos gastos e pagos** incluídos na relación de gastos e pagos.

Consideraranse, á hora de realizar a análise, os **conceptos (custos directos, custos de persoal e custos indirectos)**.

Aspectos a analizar:

1. En canto ás facturas e outros documentos acreditativos do gasto:

- Que as facturas e xustificantes de gasto cumpren os requisitos, de acordo co establecido no Real decreto 1619/2012, do 30 de novembro, polo que se aproba o regulamento polo que se regulan as obrigas de facturación.
- Que as datas de emisión estean incluídas no prazo de realización da actuación segundo o convenio de colaboración.
- Deberá comprobarse que o beneficiario procedeu ao estampillado de todas as facturas orixinais pagadas ou documentos de valor probatorio equivalente que se inclúen na relación de gastos. O estampillado incluírá a porcentaxe de financiación da Xunta de Galicia.

2. En canto aos pagos:

- Que os pagos están realizados dentro do prazo de xustificación establecido no convenio.
- Non se admiten os pagamentos en efectivo.
- Os xustificantes bancarios de pagamento deben coincidir exactamente co importe da factura, IVE incluído. No caso de que o importe reflectido no documento bancario non coincida co importe do documento de gasto (pagamento agrupado), deberase comprobar o detalle dos pagamentos efectuados onde se poida identificar o documento de gasto en cuestión.
- Se comprobará que no existen duplicidades nos conceptos facturados imputados ao presente convenio e os imputados nas axudas non compatibles, así mesmo, que a imputación se fai de xeito correcto no de axudas concorrentes compatibles. O beneficiario facilítase ao auditor ou sociedade de auditoría externa documentación para realizar a verificación.



- En canto aos pagamentos pendentes en materia de persoal, aos que se fai referencia na cláusula décima terceira, indicárase o importe pendente de xustificación. Este importe formará parte da certificación á que se fai mención na devandita cláusula e se xuntará á conta xustificativa.

C.- CONTIDO DO INFORME

O informe deberá ter polo menos o contido sinalado no artigo 7 da Orde EHA/1434/200 7, do 17 de maio e fará mención expresa a cada un dos puntos sinalados no apartado anterior.

Ademais do anterior, deberá constar no informe un cadro resumen, indicando o orzamento financiable segundo o convenio, o importe imputado polo beneficiario na documentación xustificativa, o importe realmente xustificado considerando os criterios detallados en cada caso, o importe en gastos de persoal aos que se fai referencia na cláusula décima terceira, punto primeiro, segundo parágrafo, e a cantidade finalmente válida a xuízo do auditor, tendo en conta que non poderá nunca superar ao financiable.

Ademais, explicaranse as diferenzas entre o orzamento acreditado polo beneficiario e o considerado validamente xustificado polo auditor, indicando os motivos destas e o seu importe.

Adicionalmente:

O auditor poderá incluír calquera comentario que ao seu xuízo sexa relevante e engada claridade á análise realizada.



ANEXO III: MODELO DE DECLARACIÓN DE AXUDAS

En relación con outras axudas concedidas ou solicitadas:

- ☐ Non solicitou nin se lle concedeu ningunha outra axuda para as mesmas actuacións obxecto do presente convenio.
- ☐ Solicitou outras axudas para actuacións concorrentes ás que son obxecto do presente convenio.
- ☐ É beneficiario doutras axudas para actuacións concorrentes ás que son obxecto do presente convenio.

Relación de axudas solicitadas e concedidas:

Organismo que concede a axuda	Ano	Axuda Solicitada (*)	Axuda Concedida (*)	Importe Subvencionable (€)	Porcentaxe de concesión	Axuda concedida (€)	Data de concesión	Disposición Reguladora

Así mesmo, a partir da data desta declaración, comprométome a comunicar as axudas que obteña e/ou solicite para as mesmas actuacións.

(*) Sinale o que proceda

Nome, apelidos e sinatura do representante legal e selo entidade beneficiaria


